

Rā 2, Petekoha – Rāhina/Mane i te ahiahi

He Karakia mō ngā Rāhina/Mane o te "Wā noa iho", o ia rā rānei o te wā o te Petekoha

Ka mea a Īhu, "Ka riro he kaha i a koutou, ina haere mai te Wairua Tapu ki a koutou, ā, hei kaiwhakaatu mōku ki Hiruhārama, ki Hūria katoa, ki Hamaria hoki, ā tae noa ki te pito whakamutunga o te ao."

Ngā Mahi 1.8

E te Atua o tua whakarere
Kua whakakīia ngā ngākau me ngā hinengaro
O āu tangata whakaponu ki tōu Wairua Tapu
Kia tika ai ō rātou whakaaro ki ngā mea katoa
Kia hari tonu ai i roto i tōu aroha me tōu kaha
Ko Īhu Karaiti tonu nei te kai whakaora
E ora nei, e kīngi tahi nei, me koe, me te Wairua
Kotahi tonu nei te Atua. **Āmine.**

Te Kupu a te Atua

Ētahi o ēnei Waiata a Rāwiri, ko rātou e whakarite ana i te Maramataka o te tau rānei, ā, ka mutu ia waiata, ia waiata, i ngā rā katoa o te tau, nā, ko tēnei,

Korōria ki . . .

Te Wiki tuatahi, me ngā Rātapu o te Petekoha – Waiata 68

- 1 Kia ara te Atua, kia marara ōna hoariri; •
kia whati hoki i tōna aroaro te hunga e kino ana ki a ia.
- 2 Āia atu rātou, pērātia me te paowa e āia ana; •
kia rite ki te ware pī e rewa ana i te kāpura
te ngaromanga o te hunga kino i te aroaro o te Atua.
- 3 Kia koa ia te hunga tika kia hari i te aroaro o te Atua; •
āe rā, kia tino hari pū rātou.
- 4 Waiata ki te Atua, hīmenetia tōna ingoa;
opehia ake he huanui mō tana hāriata i ngā koraha - •
tōna ingoa ko IHA - kia hari hoki ki tōna aroaro.
- 5 Hei matua mō ngā pani, hei kaiwhakarite mō ngā pouaru, •
te Atua i tōna nohoanga tapu.
- 6 E whakanohoia ana e te Atua te mokemoke ki te whare,
e whakaputaina ana e ia ngā herehere ki te ora; •
ko te hunga tutū ia e noho i te wāhi waikore.

- 7 E te Atua, i tōu haerenga atu i mua i tāu iwi; •
i tōu haerenga i te koraha;
- 8 i wiri te whenua, i tūturu iho anō ngā rangi i te aroaro o te Atua; •
me taua Hinai anō i te aroaro o te Atua, o te Atua o Īharaira.
- 9 I tāia mai, e koe, e te Atua, he ua nui; •
ā, i tōu kāinga e ruwaha ana ka whakaūkia e koe.
- 10 I noho tāu whakaminenga ki reira; •
nā tōu pai, e te Atua, i mea kai ai koe mā ngā rawakore.
- 11 Ka hōmai e Ihowā te kupu; •
he ope nui ngā wāhine whakapuaki:
- 12 “Whati rawa ngā kīngi o ngā taua!” •
Ā, ko te wahine i noho i te whare, kei te tuwha i ngā parakete.
- 16 He aha koutou ka titiro tītaha ai, e ngā maunga tiketike,
ki te maunga i hiahiatia nei e te Atua kia nohoia e ia, •
āe, ka nohoia e Ihowā ake ake?
- 17 Ko ngā hāriata a te Atua, e rua tekau mano, mano mano iho; •
kei roto i a rātou te Ariki, me te mea ko Hinai, ko te wāhi tapu.
- 18 Kua kake koe ki runga, kua whakaraua e koe te whakarau; •
kua riro i a koe he ohaoha mō te tangata;
āe, mō te hunga tutū anō, kia noho ai a Ihowā, te Atua ki a rātou.
- 19 Kia whakapaingia te Ariki, e whakawaha nei i tā tātou pīkaunga
i tēnei rā, i tēnei rā, •
te Atua o tō tātou whakaoranga.
- 20 Ko tō tātou Atua te Atua o te whakaoranga; •
nā Ihowā anō, nā te Ariki, ngā putanga ake i te mate.

Te Wiki tuarua, me ngā Rāhina/Mane o te Petekoha – nā Waiata 68

- 24 I kite rātou, e te Atua, i ōu haerenga, •
i ngā haerenga o tōku Atua, o tōku Kīngi, i te wāhi tapu.
- 25 Ko ngā kaiwaiata i haere i mua, i muri ko ngā kaiwhakatangi, •
i waenganui ko ngā kōtiro e patupatu ana i ngā timipera.
- 26 “Whakapaingia te Atua i roto i ngā whakaminenga, te Ariki hoki, •
e ngā mea i puta mai i te mātāpuna o Īharaira!”
- 27 Kei reira a Pineamine, te whakaotinga, tō rātou ariki,
ngā rangatira o Hūrā, me tō rātou rōpū, •
ngā rangatira o Hepurona, me ngā rangatira o Napatari.
- 28 Kua oti he kaha mōu te whakahau iho e tōu Atua; •
whakaūkia, e te Atua, tāu i mea ai mō mātou.

- 29 Ka maua mai e ngā kīngi he hākari ki a koe, •
mō tōu temepara i Hiruhārama.
- 30 Rīria te kīrehe o ngā kākaho, te huinga pūru, me ngā kūao kau a ngā iwi,
me te takahi i ngā pīhi hiriwa ki raro; •
whakamararatia ngā iwi e āhuareka ana ki te whāinga.
- 31 E puta mai ngā rangatira i Īhipa; •
meāke hohoro te totoro o ngā ringa o Etiopia ki te Atua.
- 32 Waiata ki te Atua, e ngā rangatiratanga o te whenua; •
hīmene ki te Ariki;
- 33 ki a ia, ko tōna hāriata nei ko ngā rangi o ngā rangi, nōnamata; •
nā, ka puaki tōna reo, he reo kaha.
- 34 Waiho te kaha i te Atua, kei runga nei i a Īharaira tāna mahi rangatira; •
kei ngā kapua hoki tōna kaha.
- 35 Ka wehingia koe, e te Atua, i roto i ōu wāhi tapu; •
ko te Atua o Īharaira te kaihōmai i te kaha, i te mana, ki tōna iwi.
Whakapaingia te Atua!

Te Wiki tuatoru, me ngā Rātū/Tūrei o te Petekoha – Waiata 127

- 1 Ki te kore e hangā e Ihowā te whare, he maumau mahi tā ngā kaihanga. •
Ki te kore e tiakina e Ihowā te pā, maumau mataara noa te kaitiaki.
- 2 He maumau tō koutou ara wawe, tō koutou noho roa i te pō,
tā koutou kai i te taro o te māuiui; •
ko tāna moe tēnā ka hōmai nei ki tāna e aroha ai.
- 3 Nā, he taonga pūmau nā Ihowā ngā tamariki, •
ko ngā hua anō o te kōpū tāna utu.
- 4 E rite ana ki ngā pere i te ringaringa o te tangata kaha •
te whānau o te taitamarikitanga.
- 5 Ka hari te tangata kua kī nei tāna papa pere i a rātou. •
E kore rātou e whakamā, ina kōrero ki ō rātou hoariri i te kūwaha.

Te Wiki tuawhā, me ngā Rāapa/Wenerei o te Petekoha – nā Waiata 18

- 1 Ka aroha ahau ki a koe, e Ihowā, •
e tōku kaha.
- 2 Ko Ihowā tōku kāmaka, tōku pā, tōku kaiwhakaora;
tōku Atua, tōku tino kāmaka, e whakawhirinaki ai ahau; •
tōku whakangungu rākau, te haona o tōku whakaoranga,
tōku pourewa tiketike.
- 3 Ka karanga ahau ki a Ihowā, e tika nei kia whakamoemititia; •

ā, ka ora i ōku hoariri.

- 4 I karapotia ahau e ngā whakawiringa a te mate, •
ā, whakawehia ana ahau e ngā waipuke o te kino.
- 5 I karapotia ahau e ngā whakawiringa a te rēinga, •
i haukotia e ngā māhanga a te mate.
- 6 I karanga ahau ki a Ihowā i tōku pāweratanga; i hāmama ki tōku Atua. •
I whakarongo ia ki tōku reo i roto i tōna temepara,
i tae anō tāku hāmama ki tōna aroaro, ki ōna taringa.
- 7 Nā, ka ngāueue te whenua, ka rū, wiri ana ngā pūtake o ngā maunga, •
ngāueue ana i tōna riri.
- 8 I kake he paowa i ōna pongaponga, •
ā, kai ana te kāpura a tōna māngai, ngiha ana ngā waro.
- 9 I whakapīngoretia e ia ngā rangi,
ā, heke iho ana, •
ā, i raro te pōuri mātotoru i ōna waewae.
- 10 I eke ia ki runga ki te kerupa, ā, rere ana; •
āe, i rere omaki ia i runga i ngā parirau o te hau.
- 11 I meinga e ia te pōuri hei wāhi ngaro mōna,
hei tēneti i tētahi taha ōna, i tētahi taha; •
ko te pōuritanga o ngā wai, ko ngā kapua mātotoru o te rangi.
- 12 I rere atu ōna kapua mātotoru i te wherikotanga o tōna aroaro; •
te whatu, me ngā waro kāpura.
- 13 I papā anō te whatitiri a Ihowā i ngā rangi, •
ā, puaki ana te reo o te Runga Rawa; he whatu, he waro kāpura.
- 14 I kōkiritia e ia āna pere, ā, marara ana rātou; •
āe, i kōperea hoki e ia te tini uira, ā, whati ana rātou.
- 15 Kātahi ka kitea ngā takere o ngā wai, •
ā, ka takoto kau ngā pūtake o te ao i tāu whakatūpehupehutanga, e Ihowā,
i te whengunga o te manawa o ōu pongaponga.
- 16 I tonono karere mai ia i runga, ka mau ki ahau; •
tōia ake ahau e ia i roto i ngā wai maha.
- 17 Nāna ahau i ora ai i tōku hoariri kaha, i te hunga e kino ana ki ahau; •
he kaha rawa hoki rātou i ahau.
- 18 I huakina tatatia ahau e rātou i te rā o tōku matenga; •
ko Ihowā ia tōku whakawhirinakitanga.
- 19 I whakaputaina ahau e ia ki te wāhi nui, i whakaorangia ahau e ia; •
he āhuareka nōna ki ahau.

Te Wiki tuarima, me ngā Rāpare/Tāite o te Petekoha – nā Waiata 18

- 20 Rite tonu ki tāku mahi tika tā Ihowā utu ki ahau; •
rite tonu ki te mā o ōku ringa tāna i whakahoki ai ki ahau.
- 21 Mōku i pupuri i ngā ara o Ihowā, •
ā, kīhai i hē, i whakarere i tōku Atua.
- 22 Kei mua tonu hoki i ahau āna whakaritenga katoa, •
kīhai anō i whakamataratia atu i ahau āna tikanga.
- 23 Tapatahi tonu hoki tōku whakaaro ki tōna aroaro, •
ā, i tiaki ahau i ahau kei kino.
- 24 Nā, ka hōmai e Ihowā he utu ki ahau, •
rite tonu ki tōku tika, ki te mā o ōku ringa i tōna aroaro.
- 25 He tangata atawhai, ka atawhai hoki koe; •
he tangata tika, ka tika hoki koe.
- 26 He tangata mā, ka mā hoki koe; •
he tangata whakakeke, ka whakakeke hoki koe.
- 27 E whakaorangia hoki e koe te iwi ngākau mamae; •
ka whakahokia anō e koe ki raro ngā kanohi whakakake.
- 28 Māu hoki e whakaū tāku rama; •
mā Ihowā, mā tōku Atua, e whakamārama tōku pōuri.
- 29 Nāu hoki ahau i rere ai nā waenganui atu i te rōpū; •
nā tōku Atua hoki i pekea ai e ahau te taiepa.
- 30 Tēnā ko te Atua, tika tonu tōna ara; kua oti tāna kupu te whakamātau; •
he whakangungu rākau ia ki te hunga katoa e whakawhirinaki ana ki a ia.
- 31 Ko wai oti te Atua, ki te kāhore a Ihowā? •
Ko wai hoki he kāmaka, ki te kāhore tō tātou Atua?
- 32 Ko te Atua, nāna ahau i whītiki ki te kaha, •
i mea kia tino tika tōku ara.
- 33 Ko ia hei mea i ōku waewae kia rite ki ō te hāta; •
māna hoki ahau e whakatū ki runga ki ōku wāhi tiketike.
- 34 Ko ia hei whakaako i ōku ringa ki te whawhai, •
ā, whati ana te kōpere parāhi i ōku ringa.
- 35 Kua hōmai anō e koe ki ahau te whakangungu rākau o tāu whakaoranga;
•
puritia ana ahau e tōu ringa matau, whakanuia ana e tōu whakaaro māhaki.
- 36 I whakanuia e koe ōku takahanga i raro i ahau; •
tē paheke ōku waewae.
- 43 Kua whakaorangia ahau e koe i ngā ngangautanga a te iwi;

- kua meinga e koe hei rangatira mō ngā tauīwi; •
 hei apa mōku te iwi kāhore i mātauria e ahau.
- 44 Kia rongō kau te taringa ki ahau, ka kakama tonu mai rātou ki ahau; •
 ko ngā tāngata iwi kē ngohe kau ki ahau.
- 45 Ka memeha haere ngā tāngata iwi kē; •
 ka puta wehi mai hoki i roto i ō rātou kuhunga.
- 46 E ora ana a Ihowā;
 kia whakapaingia hoki tōku kāmaka, •
 kia whakanuia te Atua o tōku whakaoranga;
- 47 ko te Atua, māna nei e rapu he utu mōku, •
 māna e pēhi ngā iwi ki raro i ahau.
- 48 Māna ahau e mawhiti ai i ōku hoariri, āe rā,
 māu ahau e mea kia teitei ake i te hunga e whakatika mai ana ki ahau; •
 ka whakaorangia ahau e koe i te tangata tutū.
- 49 Mō konei ka whakawhetai ahau ki a koe, e Ihowā,
 i waenganui i ngā tauīwi; •
 ka hīmene ki tōu ingoa.
- 50 He nui nei tāna whakaora i tāna kīngi; •
 e whakaputa aroha ana ki tāna tangata i whakawahi ai,
 ki a Rāwiri rātou ko ōna uri ake ake.

Te Wiki tuaono, me ngā Rāmere/Paraire o te Petekoha – Waiata 138

- 1 Ka whakapaua tōku ngākau ki te whakawhetai ki a koe; •
 ka hīmene atu ahau ki a koe i te aroaro o ngā atua.
- 2 Ka koropiko atu ahau ki te ritenga o tōu temepara tapu,
 ā, ka whakamoemiti ki tōu ingoa, mō tōu aroha me tōu pono; •
 kua whakanuia hoki e koe tāu kupu ki runga ake i tōu ingoa katoa.
- 3 I whakahoki kupu mai koe ki ahau i te rā i karanga ai ahau, •
 ā, whakahirihiritia ana e koe tōku wairua ki te kaha.
- 4 Ka whakamoemiti ngā kīngi katoa o te whenua ki a koe, e Ihowā, •
 kua rongō hoki rātou ki ngā kupu a tōu māngai.
- 5 Āe, e waiata rātou mō ngā ara o Ihowā; •
 he nui hoki te korōria o Ihowā.
- 6 Ahakoa hoki kei runga rawa a Ihowā,
 e titiro iho ana anō ia ki te hunga pāpaku; •
 tēnā ko te tangata whakakake, i tawhiti anō kua mātauria e ia.
- 7 Ahakoa haere ahau i waenganui o te hē, māu ahau e whakahauora; •
 ka totoro tōu ringa ki te riri o ōku hoa whawhai,

mā tōu ringa matau anō ahau e whakaora.
8 Mā Ihowā e whakaoti āku mea; •
e Ihowā, e mau ana tāu mahi tohu ake ake.
Kaua e whakarērea ngā mahi a ōu ringa.

Te Wiki tuawhitu, me ngā Rāhoroi/Hātarei o te Petekoha – Waiata 133

1 Nā, anō te pai, anō te āhuareka o te nohoanga o ngā tēina, o ngā tuākana •
i runga i te whakaaro kotahi!
2 Tōna rite kei te hinu utu nui i runga i te ūpoko, i heke iho nei ki te pāhau, •
āe ki te pāhau o Ārona, i heke iho nei ki te remu o ōna kākahu.
3 Kei te tōmairangi anō o Heremona,
kei tērā i heke iho ki ngā maunga o Hiona. •
I whakahaua iho hoki e Ihowā te manaaki mō reira, te ora mō ake tonu atu.

Waiata 134

1 Nā, whakapaingia a Ihowā, e ngā pononga katoa a Ihowā, •
e tū nei i te whare o Ihowā i te pō!
2 Totoro ake ō koutou ringa ki te wāhi tapu, •
whakapaingia hoki a Ihowā.
3 Mā Ihowā koe e manaaki i roto i Hiona, •
māna, mā te kaihanganga o te rangi, o te whenua.

*He Waiata Whakamoemiti nā te Kawenata Tawhito
ko tēnei*

Waiata Whakamoemiti tuatahi

1 “Nanā, ko te Atua tōku whakaoranga; •
ka whakawhirinaki ahau, e kore anō e wehi.
2 Ko te Ariki hoki, ko IHOWĀ tōku kaha, tāku waiata; •
ko ia anō hei whakaoranga mōku.
3 Nā, ka utu wai koutou i runga i te koa •
i roto i ngā puna o te whakaoranga.”
4 Ka mea anō hoki i taua rā:
“Whakamoemititia a Ihowā, karanga atu ki tōna ingoa; •
whakaaturia āna mahi ki roto i ngā iwi;
kauwhautia atu kua oti tōna ingoa te whakaneke ake.
5 Waiata ki a Ihowā, he nui noa atu hoki āna mahi; •
meinga kia mōhiohia tēnei puta noa i te ao.
6 Hāmama, kia nui te reo, e te wahine e noho ana i Hiona, •
he nui hoki te Mea Tapu o Īharaira i waenganui i a koe.”

Ihāia 12.2–6

Korōria ki . . .

Waiata Whakamoemiti tuarua

- 1 Ka waiatatia e ahau he waiata hou ki tōku Atua:
e te Ariki, he nui koe, he korōria,
he whakamīharo i roto i te kaha, e kore e taea.
- 2 Tukua āku mea katoa kia mahi ki a koe;
nāu hoki i kōrero, ā, kua hanga.
- 3 Nāu i tono mai tōu wairua, ā, hanga ana rātou;
kāhore he tangata e taea te whakakāhore i tō reo.
- 4 Ko ngā maunga hoki ka ngāueue ki runga ki ō rātou tūranga
i te taha o ngā wai;
i mua i tō kanohi ka kā ngohe ngā toka anō he pi.
- 5 Engari ki te hunga e wehi ana ia koe
e whakaatu ana koe i te aroha.

Te Pukapuka o Huriti 16.13–15

Korōria ki . . .

Tētahi anō Waiata Whakamoemiti rānei

- 1 Ka tangohia mai hoki koutou e ahau i roto i ngā tauwiwi, •
ka whakaminea i ngā whenua katoa, ka kawea mai anō
ki tō koutou oneone.
- 2 Ka tāuhiuhia anō koutou e ahau ki te wai mā, ā, ka mā koutou. •
Ka purea koutou e ahau, ā, kore iho ō koutou poke katoa,
ā koutou whakapakoko katoa.
- 3 Ka hoatu anō e ahau he ngākau hou ki a koutou, •
ka hoatu anō e ahau he wairua hou ki roto ki a koutou.
- 4 Ka tangohia anō e ahau te ngākau kōhatu i roto i ō koutou kikokiko, •
ā, ka hoatu he ngākau kikokiko ki a koutou.
- 5 Ko koutou hoki hei iwi māku, •
ko ahau hei Atua mō koutou.

Ehekiera 36.24–26, 28b

Korōria ki . . .

Ngā Pānui Karaipiture

ko tētahi o ēnei rārangi karaipiture, ko ētahi nō te Maramataka o te tau rānei

Te Wiki tuatahi, me ngā Rātapu o te Petekoha

Ā, i aua rā, ka haere mai a Īhu i Nahareta o Kariri, ka iriiria e Hoani ki Horano. Ā, i taua wā anō i a ia e haere ake ana i te wai, ka kite ia i ngā rangi e wāhia ana kia tuwhera, me te Wairua, ānō he kūkupa, e heke iho ana ki a ia. Ā, ka puta mai he reo nō te rangi, e mea ana, “Ko koe tāku Tama i aroha ai, tāku i āhuareka ai.”

Māka 1.9–11

Te Wiki tuarua, me ngā Rāhina/Mane o te Petekoha

Ka mea a Ihowā, “Nā, tēnei ake, ka ringihia e ahau tōku wairua ki ngā kikokiko katoa, ā, e poropiti ā koutou tama, ā koutou tamāhine, ka moemoeā ō koutou kaumātua, ā, ka kitea te kitenga e ā koutou taitamariki. I aua rā anō ka ringihia e ahau tōku wairua ki ngā pononga tāne, ki ngā pononga wāhine.”

Hoera 2.28–29

Te Wiki tuatoru, me ngā Rātū/Tūrei o te Petekoha

Tēnei ake anō tētahi kupu whakarite i makā e Īhu ki a rātou, i mea ia: “He rite te rangatiratanga o te rangi ki te pua nanī, i kawea e te tangata, i ruia ki tāna māra. He iti rawa ia i ngā purapura katoa, ā, ka tupu, ko ia te nui rawa o ngā otaota, ā, whakarākau ana, nō ka rere mai ngā manu o te rangi, ka noho ki ōna manga.”

Matiu 13.31–32

Te Wiki tuawhā, me ngā Rāapa/Wenerei o te Petekoha

Nā, i a mātou ka tūmanako nei ki tēnei, nui atu tō mātou māia ki te kōrero. Kāhore anō e pērā me Mohi i maka nei i te hīpoki ki tōna mata, kei titiro matatau atu ngā tama a Īharaira ki te tukunga iho o te mea e memeha haere ana. Otirā, i whakapakeketia ō rātou hinengaro. Nō te mea taea noatia mai tēnei rā i te kōrerotanga o te kawenata tawhito e mau tonu ana taua hīpoki rā anō, kāhore anō i hurahia; i roto ia i a te Karaiti ka whakakāhoretia. Nā, tae noa mai ki tēnei rā, ki te kōrerotia a Mohi, e takoto ana he hīpoki ki runga i tō rātou ngākau. Nā, kia huri ki te Ariki, ka tangohia te hīpoki. Nā, ko te Ariki, ko te Wairua ia; ko te wāhi i noho ai te Wairua o te Ariki, kei reira te tikanga herekore. Ko tātou katoa ia kāhore he hīpoki mō te mata, e whakaahua ana i te korōria o te Atua, ānō kei roto i te whakaata, ā, e whakaputaia kētia ana kia rite ki taua āhua anō, he korōria hono iho ki te korōria, i runga i tā te Wairua o te Ariki.

Te Wiki tuarima, me ngā Rāpare/Tāite o te Petekoha

Ka tomo a Īhu ki Kaperenauma. Nā, e mate ana te pononga a tētahi keneturio, meāke marere, ko tāna hoki i matenui ai. Ka tonoa mai ētahi hei mea ki a ia kia haere ki te whakaora i tāna pononga. Nā, haere tahi ana a Īhu me rātou. Ā, i a ia kāhore nei i matara i te whare, ka tono te keneturio i ētahi hoa ki a ia, ka mea ki a ia, “E te Ariki, kei maumau ngenge noa koe, ehara hoki ahau i te tikanga tangata e haere ake ai koe ki raro i tōku tuanui; koia tē tae ai tōku aro ki te haere atu ki a koe. Engari, kia puaki mai tāu kupu, ā, ka ora tāku pononga.” Ā, i te rongonga o Īhu ki ēnei mea, ka mīharo ki a ia, ka tahuri, ka mea ki te mano e aru ana i a ia, “Ko tāku kupu tēnei ki a koutou, kāhore anō ahau i kite i te whakapono hei rite mō tēnei te nui, ahakoa i roto i a Īharaira.” Ā, rokohanga atu e te hunga i tonoa, i tō rātou hokinga atu ki te whare, kua ora te pononga rā.

nā Ruka 7.1–10

Te Wiki tuaono, me ngā Rāmere/Paraire o te Petekoha

Nā, whakarongo, e tāku pononga, e Hākopa, e Īharaira, e tāku i whiriwhiri ai. Ko te kupu tēnei a Ihowā, a tōu kaihanganga, nāna nei koe i whakaahua i roto i te kōpū, māna nei koe e āwhina, Kaua e wehi, e Hākopa, e tāku pononga, e Iēhuruna, e tāku i whiriwhiri ai. Nō te mea ka ringihia e ahau he wai ki runga ki te tangata matewai, he awa ki te wāhi maroke; ka ringihia e ahau tōku wairua ki ōu uri, tāku manaaki ki tāu whānau. Ā, ka tupu rātou i waenga taru, anō he wirou i te taha o ngā rerenga wai.

Ihāia 44.1–4

Te Wiki tuawhitu, me ngā Rāhoroi/Hātarei o te Petekoha

Ka mea a Īhu, “Ko ahau te wāina, ko koutou ngā manga. Ki te ū tētahi ki roto ki ahau, me ahau hoki ki roto ki a ia, ka maha o tērā hua; ki te motu kē hoki i ahau, e kore tētahi mea e taea e koutou. Ki te ū koutou ki roto ki ahau, ki te ū anō āku kupu ki roto ki a koutou, inoia e koutou tā koutou e pai ai, ā, ka meatia mā koutou. Ka whakakorōriatia tōku Matua ki te pēnei, ki te whai hua maha koutou, ā, ka meinga koutou he ākongā nāku.”

Hoani 15.5, 7–8

Te Waiata a te Puhi Tapu, a Meri

Kiānga mō ngā rā noa iho

Ka whakanui tōku wairua i roto i a koe, tōku Atua, •
kua ara koe mō mātou he Kaiwhakaora he mea nui.

Kiānga mō te wā o te Petekoha, rānei

Hareruia! Kua kī katoa te whenua i te Wairua o te Atua; •
ko te whakaaro nui tapu, kāhore nei ōna putanga kētanga,
i roto i a te Karaiti kua whakahoungia e te Wairua ngā mea katoa. Hareruia!

Kiānga mō ngā Apōtoro me ngā Kaituhi Rongopai, rānei

Kua tuingia ki ngā tūranga kohatu o te pā i te rangi •
ngā ingoa o ngā āpōtoro o te Reme.

Kiānga mō ngā Mihingare, rānei

Anō te āhuareka o ngā waewae i runga i ngā maunga •
o te kaikawe i to rongo pai
e kauhau ana i te maungārongo.

Ka whakanui tōku wairua i te Ariki; •

e hari ana tōku wairua ki te Atua, ki tōku Kaiwhakaora;

Mōna i titiro ki te iti o tāna pononga; •

tā te mea hoki kātahi ahau ka kīia e ngā whakatupuranga katoa
e haere ake nei, he wahine hari.

He nui hoki ngā mahi a te Mea Kaha ki ahau; •

he tapu hoki tōna ingoa.

He mahi tohu tāna ki te hunga e wehi ana ki a ia; •

ki tēnei whakatupuranga, ki tēnei whakatupuranga.

Kua whakaputaina he kaha e ia, arā e tōna ringa; •

nāna te hunga whakakake i marara ai, i te whakaaro
o ō rātou ngākau.

Kua whakatakā e ia ngā piriniha i ō rātou torōna; •

ā, whakateiteitia ake ana te hunga iti.

Kua whakakīia e ia te hunga mate hiakai ki ngā mea pai; •

kua tonoa kautia atu ana te hunga taonga.

Kua tautokona e ia a Īharaira, tāna pononga; •

he whakamahara hoki ki tāna mahi tohu.

Ki a Āperahama rātou ko tāna whānau ake tonu atu; •

pērā hoki me tāna i kōrero ai ki ō tātou mātua.

Ruka 1.46–55

Kia whakakorōriatia te Matua, te Tama; •

me te Wairua Tapu;
ko te ritenga ia i te tīmatanga, ā tēnei anō ināianeī; •
ā ka mau tonu iho, ā ake ake. Āmine.

ko tēnei rānei

Korōria ki te Matua, ki te Tama,
ki te Wairua Tapu; •
mai i te tīmatanga, ki tēnei wā,
ā, haere ake nei. Āmine.

Kiānga anō

Ngā Īnoi

Ngā Īnoi takawaenga me ngā whakawhetai

E te Ariki, kia aroha mai.
E te Karaiti, kia aroha mai.
E te Ariki, kia aroha mai.

*Te Īnoi mō te rā, te Īnoi mō te Rāhina/Mane, te Īnoi mō te Rā o te Petekoha rānei***Te
Īnoi mō te Rāhina/Mane**

E te Atua ora, e te Wairua Tapu ora tonu,
kia maringi iho mai
tōu ngao kanapa taunanawe
i whakakā ai i aua ākongā tuatahi
kia tahuri anō ai te ao. Āmine.

Te Īnoi mō te Wā o te Petekoha

E te Atua kaha rawa,
i tēnei rā i whakakāngia ai e koe te mārama o tōu Wairua
ki roto i ngā ngākau o tāu hunga whakapono;
meinga, mā taua Wairua anō,
e tika ai ā mātou whakatau katoa,
e hari koa ai hoki mātou i roto i tōu aroha me tōu kaha;
ko Īhu Karaiti tō mātou Kaiwhakaora,
ko ia e ora ana e kīngi tahi ana
me koe me te Wairua Tapu,
kotahi anō Atua, āianeī, ā ake tonu atu. Āmine.

Te Īnoi a te Ariki

Kia whakakotahi i te Wairua, ā,
kua akona nei tātou e tō tātou Ariki, ka ĭnoi tātou.

E tō mātou Matua i te rangi

Kia tapu tōu Ingoa.

Kia tae mai tōu rangatiratanga.

Kia meatia tāu e pai ai

ki runga ki te whenua,

kia rite anō ki tō te rangi.

Hōmai ki a mātou āiane

he taro mā mātou mō tēnei rā.

Murua ō mātou hara,

Me mātou hoki e muru nei

i ō te hunga e hara ana ki a mātou.

Aua hoki mātou e kawea kia whakawaia;

Ēngari whakaorangia mātou i te kino;

Nōu hoki te rangatiratanga, te kaha,

me te korōria,

Ake ake ake. Āmine.

Te manaakitanga

Kia tau ki a tātou katoa

te atawhai o tō tātou Ariki, o Īhu Karaiti,

me te aroha o te Atua,

me te whiwhinga tahitanga ki te Wairua Tapu,

ake ake. Āmine.

I te wā o te Petekoha, ko tēnei rānei:

Kia nanawe e te Atua i roto i a tātou te ahi o te aroha. Āmine.

Kia whakapaingia te Ariki. Hareruia! Hareruia!

Ki te Atua ia te whakawhetai. Hareruia! Hareruia!